



ՓՈԽՀԱՄԱՁՆՈՒԹՅԱՆ ՀՈՒՇԱԳԻՐ

«Հայաստանի երիտասարդ իրավաբանների ասոցիացիա» հասարակական
կազմակերպության

և

«Հայաստանի Հանրապետության փաստաբանական դպրոց» հիմնադրամի միջև
փաստաբանների վերապատրաստման դասընթացների իրականացման շուրջ
համագործակցության վերաբերյալ

«Հայաստանի երիտասարդ իրավաբանների ասոցիացիա» հասարակական
կազմակերպությունը (այսուհետ՝ ՀԵԻԱ)՝ ի դեմս նախազահ Կարեն Զաղոյանի, և «ՀՀ
փաստաբանական դպրոց» հիմնադրամը (այսուհետ՝ ՀՀ փաստաբանական դպրոց)՝ ի
դեմս տնօրեն Ն. Յու. Բաղդասարյանի (այսուհետ միասին հիշատակման դեպքում՝
Կողմեր), կնքում են սույն փոխհամաձայնության հուշագիրը (այսուհետ՝ ՓՀ) հետևյալի
մասին.

I. ՆՊԱՏԱԿԸ

Հաշվի առնելով «Փաստաբանության մասին» ՀՀ օրենքի 45.12-րդ հոդվածի 2-
րդ կետի պահանջը, համաձայն որի՝ փաստաբանը պարտավոր է անցնել
փաստաբանների պալատի խորհրդի սահմանած կարգով և ժամաքանակով
վերապատրաստման դասընթացներ, որոնք չեն կարող երկու տարվա ընթացքում
քառասունութ ժամից պակաս լինել,

Նկատի ունենալով, որ ՀԵԻԱ-ն ունի փորձ Հայաստանում իրավաբանների, այդ
թվում՝ փաստաբանների համար կրթական ծրագրերի իրականացման բնագավառում,
ներառյալ ՀԵԻԱ-ի կողմից իրականացվող ծրագրերի շրջանակներում ուսումնական
գործընթացի կազմակերպման և ուսումնական ծրագրերի մշակման հարցերում,

Կողմերը կնքում են ՓՀ՝ նպատակ հետապնդելով առավել արդյունավետ
դարձնելու փաստաբանների շարունակական կրթությանն ուղղված դասընթացների
կազմակերպումը, համակարգելով և համապատասխանեցնելով Կողմերի՝ այդ
ուղղությամբ կատարվող աշխատանքները:

II. ԿՈՂՄԵՐԻ ԻՐԱՎՈՒՔՆԵՐԸ ԵՎ ՊԱՐՏԱԿԱՆՈՒԹՅՈՒՆՆԵՐԸ

1. ՀԵԻԱ-ն պարտավոր է.

- 1) համագործակցել ՀՀ փաստաբանական դպրոցի հետ ուսումնական ծրագրի մշակման և փաստաբանների վերապատրաստման դասընթացի անցկացման համար,
- 2) դասընթացները կազմակերպել՝ հաշվի առնելով ՀՀ փաստաբանական դպրոցի կողմից ընդունված վերապատրաստման դասընթացների ծրագրի և մեթոդաբանության նկատմամբ ներկայացվող պահանջները,
- 3) անհրաժեշտության դեպքում յուրաքանչյուր դասընթացի վերաբերյալ ՀՀ փաստաբանական դպրոցին տրամադրել վերապատրաստման համար կազմված ծրագրերը, եթե այդպիսիք ՀՀ փաստաբանական դպրոցի կողմից հաստատված չեն,
- 4) ֆինանսավորել իր կողմից իրականացվող դասընթացները համաձայն իր կողմից իրականացվող ծրագրերի բյուջեների, մասնավորապես տրամադրել տարածք, ուսումնական նյութեր, անհրաժեշտության դեպքում կազմակերպել սուրճի ընդմիջում և այլն:

2. ՀՀ փաստաբանական դպրոցը պարտավոր է.

- 1) ՀԵԻԱ-ի կողմից անցկացված դասընթացները համարել վերապատրաստման դասընթացների ժամեր,
- 2) վճարել վերապատրաստողին մատուցած ծառայության (դասախոսության) համար՝ հիմք ընդունելով ՀՀ փաստաբանական դպրոցում վերապատրաստման համար վճարման չափանիշը:

3. ՀԵԻԱ-ն իրավունք ունի.

- 1) կազմակերպել վերապատրաստման դասընթացներ՝ կատարելով դասախոսների, ինչպես նաև թեմաների ընտրություն,
- 2) նախապատրաստել դասընթացի նյութերը,
- 3) համագործակցել ՀՀ փաստաբանական դպրոցի հետ վերապատրաստման կազմակերպման և անցկացման համար հնարավոր համաֆինանսավորման նպատակով:

4. ՀՀ փաստաբանական դպրոցն իրավունք ունի.

- 1) պահանջել տեղեկատվություն նախապատրաստվող դասընթացների վերաբերյալ,
- 2) ՀՀ փաստաբանական դպրոցի համապատասխան ներկայացուցիչն իրավունք ունի մասնակցել և դիտարկել սույն հուշագրի շրջանակներում կազմակերպվող ՀԵԻԱ-ի կողմից անցկացվող ցանկացած դասընթացը:

III. ԺԱՄԿԵՏՆԵՐ

5. ՓՀ-ի գործողությունը սկսվում է 2013 թվականի օգոստոսի 1-ից և ավարտվում է 2015 թվականի օգոստոսի 1-ին:

IV. ԵԶՐԱՓԱԿԻՉ ԴՐՈՒՅԹՆԵՐ

6. ՓՀ-ում պարզաբանումներ, փոփոխություններ և (կամ) լրացումներ կատարվում են Կողմերի համաձայնությամբ:
7. ՓՀ-ն դադարում է Կողմերի փոխադարձ համաձայնությամբ՝ այդ մասին 5 (հինգ) օր առաջ տեղյակ պահելով մյուս կողմին:
8. ՓՀ-ն իրավաբանական ուժ է ստանում կնքման պահից:
9. ՓՀ-ն կնքվում է Երևանում, 2013 թվականի օգոստոսի 1-ին, երկու օրինակից, որոնք ունեն հավասար իրավաբանական ուժ: Յուրաքանչյուր կողմին տրվում է մեկական օրինակ:
10. Ի հաստատում վերը նշվածի՝ ՀԵԻԱ-ն և ՀՀ փաստաբանական դպրոցը կնքում են սույն ՓՀ-ն:

V. ԿՈՂՄԵՐԻ ՏՎՅԱԼՆԵՐԸ, ՍՏՈՐԱԳՐՈՒԹՅՈՒՆՆԵՐԸ

«Հայաստանի երիտասարդ իրավաբանների
ասոցիացիա» հասարակական
կազմակերպություն

նախագահ Կ. Զադոյան

«Հայաստանի Հանրապետության
փաստաբանական դպրոց»
հիմնադրամ

տնօրեն Ն. Յու. Բաղդասարյան

